

廣西通志

六

廣西人民出版社

广西通志

六

〔清〕 谢启昆 修
胡 虔 纂

广西师范大学历史系
中国历史文献研究室 点校

广西人民出版社

广西通志卷一百十

山川略十七 川二

桂林府二

阳朔县

桂江，由临桂县南亭驿经县城至平乐。（《金志》）在县治南。（《方輿纪要》）

兴平水，县北三十里。①源出宝子山，②南流与漓江合，北流为零水，出道州。（《郝志》）熙平水，源出熙平县东龙山，西南流，径其县南，又西注漓水。（《水经注》）熙平水，亦曰兴平水，《寰宇记》谓之永乐水。（《一统志》）

安乐水，县西南二里。（《金志》）源出永福县安乐山。（《一统志》）

归义水，县西二里。源出古归义县。（《一统志》）由田家渡合桂水东注。（《金志》）

东晖水，县西北五里。（《方輿纪要》）发源东晖村，达于桂江。（《金志》）

西溪水，县西一里。源出云源山。（《一统志》）曲折绕珠明洞前，③自西而来，故名。（《李志》）入于桂江。（《方輿纪要》）

双月溪，县南二十余步。有桥。昔传水中常见双月影，

故名。（《李志》）

观源溪，县西十五里。出乳洞下。（《金志》）

西湖，县西关内。四山之水汇而为湖，引入城濠，因名。

龙潭，县治东南五十步双月桥旁。阔四十余丈，深泓莫测。内出金鱼。或云：有窍通海，时或潮溢。朱鸾有诗。

碧峰潭，县东南碧莲峰下。幽深可爱，秋月光耀，澄清万顷。

五龙潭。县北十里。悠长而深。昔传有五龙居之，故名。

犀潭，县南三十里龙跻、松江二水合处。有石穴。父老传云有犀藏焉。岸旁细草茸碧，俗呼为犀草。

龟潭，县西北五十里。有龟群出，则其年大稔。

东洲，县城对江。平广百余丈，江水分流。

芙蓉池，县西双柏书院后。约数十丈，周围皆芙蓉。邑令沈文旻有诗。

龙母池，县南。

清泉，县治西南二十步。涌出石渠之崖，冬温夏凉，通邑汲以煎茶。

蜻蛚泉，在北极宫旁。明万历间，蜻蛚涌出，流于溪石之上，父老以卜丰登，其后果应。

圣水泉，县北十五里杨梅庄金龙山古庙前。从石眼浸溢，秋冬则涸，民或祀庙，无泉，祷之辄涌出，盈坎而止，祀事毕，仍涸。人呼为圣水。

赵源泉，县北二十里。昔传乡民夜见金鸡灯于林莽间，祷以禳之，复有幢幡出崖，患水远，再祷，忽一夕飞泉涌出。至今名焉。

金泉，县西二十里。（俱同上）

飞泉，县西五十里。泉涌出山腰，悬石百级，飞注而下，如泻银河。（《方輿纪要》）

异鱼塘，县西十五里。内产五色杂鳞鱼，投以饵则出，然不可食，禁民勿网。（《金志》）

朝夕塘，县东。（《一统志》）熙平县南有朝夕塘，水出东山西南，塘水从山下注，塘一日再增再减，盈缩以时，未尝愆期，同于潮水，因名此塘为朝夕塘。（《水经注》）

清白塘，县西北翠屏山西麓。两湫相去尺许，清浊自分，遇春涨混为一，而水色自别。（《一统志》）

石渠，县城外。高数仞，下有涧，泉深百尺。（《金志》）

逼井，县东练旗山下。泉脉通江，至春，水辄涌沸。（《方輿纪要》）

珠明井，县治西百余步道旁。其源清洁，自然而溢，不由浚凿。行人多饮之。（《金志》）

报恩井，县治北报恩寺前。泉源清洁，从石窍而出。

翠屏石井，在崇教寺后。传闻井中或有巨响如鼓，乡民遇旱，汲水祈祷即雨。（《志金》）

犀牛井，县西十里。犀牛巖山下有岩，古传内有犀牛，天将雨，岩内水涌出，其声如雷。（《志金》）

六井，县西十五里。有石数级，下有六窍溢水，四时不竭。（《志金》）

潮水井，在屈家村。其水日辄三潮，或云有窍通海。（《俱同上》）

永宁州

白马江，州西一里。出白马村山下。（《郝志》）

西而北，少东，会州东南之登云、凤凰、洞头、枫门诸山水，又东北径安息塘，合芒洞水；又东，经牛河塘，合上闾村诸水，下注永福。

东江，州城东。（《郝志》）源出大晏岭，合上流四源之水而汇为大江，潴淤于此。（《金志》）下流入永福县界，合太和江。（《方輿纪要》）

小江，州东北一里。从文笔山隘下流出，径九顶村达大江。（《金志》）

西江，源出沙牛隘。（《一统志》）在州北，流径安息营前入大江。（《金志》）

施龙江，在州北。两峰山岩水涌，亦入大江。（《一统志》）

里旺江，在州东北。源出里旺村，南入大江。

富河江，在州南桐木镇前。出镇西二里，流径镇前，行十里，入地伏流十里，至柳州府融县始出。（俱同上）

大岩江，岩出泉，会大江。（《郝志》）凤凰山更进十余里曰大岩，其下有穴出泉，径行数十里，至旧县，会于大江。（《金志》）

回龙江，在新兴里旧县村。会三江之流，至州东城下。（《金志》）

洞源江，州南二十里。出洞源山，与黄源江合。

茫洞江，州北。出茫洞村，东流会大江。（俱同上）

大长江，州北五十里。源出都狼山之大长泉，一名济泉。东南流，入永福界，下流合于漓。（《方輿纪要》）约三里，会大江，循北而东，流入永福，名曰太和江，而入漓。（《金志》）

黄源江，州西北二十里。源出黄源山，东南流，至州城

东，曰东江，亦曰大江。又东南，入永福界。（《一统志》）江流径永福县界，合太和江，入于漓。（《方輿纪要》）州北境生苗界有黄源水，出黄源山，东南流数十里，有一水自西来会；又东南流，会东北一水；又东南，至州东境，有州西北八寨隘南水东北流，合北山一水，又东北折东南流，径州城东北，又有州东南水自穿岩堡北流，合西来一水，又北，合西来城南一水，又北，径城东而北合而东流十余里，来会黄源水；又东南，径兴隆村西南，有大长江自北合一水南流，径村东南来会；又东南四十里，入永福县西南境。（《水道提纲》）

古县有常安水。（《九域志》）去慕化县七步。（《元和志》）源出慕化县西南二十九里须离山，东北流，径县南，又径县东，屈而东南流，径永福西，又东，注白石水。（《寰宇记》）按：常安水无考。今有洞源江，出洞源村，东流，合黄源江；又大岩江，至旧县村入大江；又回龙江，至州东城下为大江，疑即常安水也。（《一统志》）

山旱潭，州南二里山旱村前。其水深碧，中有大鱼，罟网不能得。（《全志》）

永福县

西江，在城西。水如带。（《郝志》）源出永宁州石山下，西南流，至县西北，合银河江，径凤巢山西，又南，至县西南，合百石水。其水澄清，任大江洪涨，汇流不浊。（《一统志》）

木皮江，县西北三十里。源出古底村，流入西江。（《一统志》）

丹竹江，出下边山，与木皮江俱流径废理定县，入太和

江。（《方輿纪要》）

都济江，县西。一名亭子门水。一出大蛤，一出车元，一出大茅，至大假平岭合流入大江。（《金志》）

龙溪，县西南十里。自小江头陂来，停渚十余里，螺峰环于右，金山列于左。民环溪而居。夕阳西下，江水娟媚，鱼舟出没于芦荻烟水间，为永福佳境。（同上）

石流江，在县南乡。由瓦窑大湖葛塘入大江。（《金志》）出荔浦县界，与修仁县界之古垛江互相灌委，合太和江，注漓。（《方輿纪要》）有修仁四牌溪水，下流四十里，西北至龙江堡之寨沙墟，为石榴河。由寨沙西南行八十里，至雒容之大汾塘，此支河之旁出者也。（县册）

大江水，湘漓之分流，至临桂苏桥与义宁珠江合流，径县城南，又与西江水会，西南下雒容（《金志》）永福水，在县西南城下有金山潭，众水会同，④金山水逆塞，澄汇六七里，永福水由此分流，曲折群山中，夺流而西南出，入柳州府雒容县境，为雒清江之上流。（《方輿纪要》）

谨案：《方輿纪要》载永福水，《金志》载大江水。二水同径县城，同注雒容，当是大江水者即永福水也，故并为一水记之。

太和水，县西南。其上流即永宁州大长江也。径太和山下，因名太和江。东流入漓。（《方輿纪要》）自永宁州之都狼岭西下，入县界。（县册）

谨案：《金志》作“太和水出太和山”，误。

金山水，县西十里。东流，合白石水。（《郝志》）

护火水，县西北十里。东流，合白石水，通柳州。（同上）

银洞水，县西十五里。东流，合护火水。（《李志》）

源发登山，石壁崆峒，水自洞中出，飞扬澎湃，其色如银，下溉民田无算。径县西江，每春江波涨，此水汇流，清而不浊。（《金志》）有二源，一出石城隘，一出茶山，并流为银洞水。东至城西，谓之西江，有西江渡。下流入常宁水。（《方輿纪要》）

常宁水，县东三十里。与县南大融水俱流合白石水。（《方輿纪要》）东南自独秀山西北流，合南来之异鱼塘水。又东北数十里，而白石江之会义江折而南流者，复合也。（《水道提纲》）

大荣水，在县南。（《方輿纪要》作“大融水”，《金志》“南”作“西”）北合白石水。（《郝志》）

桐古水，一出源头，一出亮底，至松明塘合流，北至桐古鹅江，入大江。（《金志》）铜鼓濑水，在县东六十里，即白石水下流也。（《方輿纪要》 谨案：“桐古”一作“铜鼓”，音近字异）源出阳朔龙隐岩，西流，合常宁水。（《一统志》）

张峡水，县东。出含丹岭，西流，至张峡村入大江。（《金志》）

白石水，县东北四十五里。（《金志》）径县东，去县七步。（《元和志》）东北自临桂县来，径县理东，又西南，入理定县界。（《寰宇记》）诸山溪水所汇也。昔人于此凿渠以通漓江。（《方輿纪要》）其上流自临桂之相思江分离水，西至苏桥，受义宁之义江，南流，径县东，亦名永福江。（《一统志》）环县城之东南而北二十里，分二支：一东北流，为常宁水；其西北流，中有沙洲，曰白石江，径破村西而东北，与义宁县之义江会于临桂县两江埠之东。（《水道提纲》）

马芒水，源自白崖古栗，北流入大江。（《金志》）

下陋水，源自兰麻，入大江。（《郝志》）兰麻山水流为下漏川，入漓。（《名胜志》）

舟渡水，由镰刀滩入大江。（《金志》）

古桑水，（《名胜志》作“古礞江”）在县南乡。源自官江，绕沙滩古罗入大江。

洛容水，出古田上宋，绕江口入大江。（俱同上）

毛江，发源毛峒里黄源中，下六陡，西出至县治东，汇大江水，径县治右，会西江水，合流下雒容。（《金志》）汇黄源、大波、远江诸山之水合流而下之支河也。（《水道提纲》）

白鹤池，在县西。传有仙鹤飞来。（《郝志》）又名鹤沼，县城西郊外。相传池中忽产并蒂金色莲数本，时有双鹤集于池上，建仙鹤坊，址尚存。（《金志》）

凤凰池，在凤巢山西北。山半有池二，四季澄泓。一名凤池。山僧汲饮于此，并以溉田。虽大旱，不竭。（《金志》）

甘泉，在县之东岭。每春涨水恶，即汲饮此泉。（同上）

玉泉，在凤巢山顶。（《郝志》）四季澄清，名曰玉液。（《金志》）

理定县有古冻水。（《九域志》）

义宁县

义江，县西门外。宽处十余丈，涨涸不常，难通舟楫。（《金志》）在县北，即古洛溪水也。（《一统志》）洛溪水，出永丰县西北洛溪山，东流，径其县北，又东南，径始安县，而东注漓水。（《水经注》）义江，亦名珠江，在

县北七十里。源出丁岭山，流径县西，中有义江洲，一名浮洲。又南，至苏桥驿，分为二：一东入临桂县，合相思水入漓；一南径永福县东，合白石水。（《一统志》）江出县北生苗中，东南流入界，又折而南，有二水西北自苗界合而东流来会。又东南流，径桑江司西南，有桑江自东北山来会。折西南流，有灵秀山水自西北来会。又南，径县城西。又南，有县东二溪自东北合而西南，径城南来会。又有一溪自西北来东注之。又西南，径鹅桥西。又西南，曲曲数十里，至两江埠，与白石江会也。（《水道提纲》）

石濠江，县东南三里。宽三、四丈。源出毛皮界，流合义江，不通舟楫。（《金志》）

山末江，县西南。流达临桂苏桥。（《金志》）源出灵鹫山，南入永福江。（《一统志》）

智慧江，县西北二十里。发源牛路山。（《金志》）源智慧山，北流而南入义江。（《一统志》）

灇江，县东北二十五里。发源鸡笼山，下流合义江。（《金志》）

全州

湘水，过零陵县东，又东北过洮阳县东。（《水经注》）州城南一里。自兴安阳海山北流四十里，⑤越城峽，至州境，接洮、灌二水，入湖广东安县界。⑥（《方輿纪要》）自灵渠分水，东北流，径界首东五里，关水从西来注之。又东北径建安司西，右纳建安水，又北纳建乡水。又北，径洛口东，焦川水西来注之。又东北，至小江口，白沙水西北来注之。又北，至平山渡西，有水从东来注之，水出愚乡，有二源，一出四溪源，一出大朝源，俱北流，至长亭江而合，又

北合贤家寨水，又西北十余里，径沟南东塘村西，又东北入湘水。湘水又北合套子口水。又北，至城东合江门前，东西纳罗、灌二水。又北，至响桥头，上界洞水东来入焉。又北，纳官溪水。又北，纳洮水。又北，纳张家湾水。又北，笔水入焉：水出朱塘，东流，径白毛东南，又东，径笔山，北入湘水。湘水又西北，纳宜湘水。又东北，径上厂、下厂，出湖广东安县界。（《州志》）

湘源有观水。（《隋志》）源出平乐府贺县界东北。（谨案：“贺县”当作“恭城”）径灌阳县境入州界，注于湘。（《方輿纪要》）水出灌阳县，西流，至会湘桥入州境，纳璜溪水。又西北，径马头山白水村，出合掌山金鸡山之间，纳山湾水：水出大桥源，东北流，深步源水从东南来注之。又北，径陈家岭西。又北，径深普洞东。又东，径山湾村南，又东北入灌水。灌水又北过塹水岭东。又北，过潭家田黄土西。又北，径五百岭西。又北，径元洞、长冲、大车田、槐头之间，绕望母岩下。又西北，径邓家埠大坟、小蒜诸村。又北，至城东东门合湘水。（《州志》）

罗水，北流入湘。（《方輿胜览》）在州西五里。出罗氏山，东流，径州南入湘。（《方輿纪要》）罗江，出州西北与湖南新宁县之覆釜山，南流，合二溪，又合东北之钻钼潭水，东南流数十里，有钟乐水自西来会。又东，有一水自北来会。又东南数十里，受北来二小水，折而南流数十里，至州城西南入湘江。（《水道提纲》）水有三源：曰万乡，曰寨墟，曰大会。三水至流蓝埠合流，始名罗水。东南流过飞鸾桥。又东，径磐石下至合江入湘。（《州志》）宋范成大罗江诗：岭北初程分外贫，惊心犹自怯晴岚。如何花木湘江上，也有黄茅似岭南。）

合江，在完山下。湘、灇、罗三水至此汇流入楚。（《郡志》）州东北门曰合江门，其对面钵盂山即罗、灇二水入湘处。（《方輿纪要》）

洮水，出洮阳县西南大山东北，北径其县南，又东流注于湘水。（《水经注》）源出文山，南流入湘。水北为阳，故汉县以洮阳名。（《方輿胜览》）山下出泉，喷激有声，因名。汉高祖十二年，英布军败走江南，高祖令别将追破布军于洮水南北，因说以为此洮水，或以为今南直溧阳县之洮湖也。⑦《湘中记》：零陵有洮水。谓此。（《方輿纪要》）三角司东有洮水，东北入湖南界。（《水道提纲》）洮水在城北三十五里，发升乡之山屋源，有二源：左出灵源寨万乡界上，右出风王殿岭，夹山而出，曲折北流二十里，会双江口，又五里，出山口，曰洮江，转东南流十里，径文山下，复分一水，至双桥下复合，又三里，至文村旁会湘水。（《州志》）明蒋冕《洮水考》：洮阳为县，属零陵郡，载在《前汉书·地理志》中，《后汉书》所志亦同。而《史记》本纪已有“汉将破英布，军洮水南北”之说，实高祖之十二年，则洮阳正以破布军有闻于时而名县。水北曰阳，洮阳则洮北也。《前汉书·王子侯表》：“武帝元朔五年，封长沙定王发之子狩燕，为洮阳侯”，则元朔以前，洮阳已为县也。注《史》《汉》诸家者，皆莫能的知洮水所在：苏林则曰洮音兆，徐广则曰洮音道，在江淮间。至史炤著《通鉴释文》，亦谓洮音兆，在淮南。盖史炤字音引用苏说，而所谓在淮南者，则因英布王淮南，遂篡取徐广之说，以为洮水在淮南，皆以己意揣度言之，非其实也。惟胡三省灼知其误，且云：“按《通鉴》布军既败走江南，高祖令别将追之，别将击布军于洮水南北，皆大破之。则洮水当在江南。罗含《湘中记》：‘零陵

有洮水。’《水经注》：‘洮水出洮阳县西南，东流注于湘水。’如淳注《汉志》：‘洮阳之洮音韬。’盖布旧与长沙王婚，其败也，往从之，而洮水又在长沙国境内，英布之军实大败于此。杜佑曰：‘汉洮阳城，在永州洮源县西北。’按今全州，汉洮阳县地，有洮水，在清洮县北。”胡氏此说，考据最为精审。《史记·黥布传》：“布军败走，渡淮数战不利，与百余人走江南。布故与番君婚，以故长沙哀王使人给布，伪与亡，诱走越。”盖洮阳在零陵南，为楚极南之境，洮阳之南，则越境也。自楚入越，未有不经过洮阳者。胡氏以洮水南北为吾洮阳，而用如淳之音，一洗徐广、苏林、史炤诸说之谬。今陕西有临洮府，又有洮州卫。临洮在汉属陇西郡，陇西洮水出西羌中，北至枹罕，洮州卫亦以西羌洮水所经得名。《春秋》鲁僖公八年及二十五年：公两会诸侯，盟于洮。杜氏谓：洮，曹地。盖以西羌洮水经曹地，因而名之，皆与吾洮阳之洮全不相涉。东晋时，宋武帝继母孝懿皇后父肃卓为洮阳令，宋文帝元嘉三十年，宗慤以功封洮阳侯，皆吾全之洮，非陇西之洮也。鹤山魏文靖公亦谓清湘上溪，东出于濂溪，西会于洮水。正指汉将破布军处。盖洮水视湘水，虽小，而县以洮名，顾在湘水未名县之先。自汉至隋皆然。隋平陈后，始废洮阳，而以湘源名县，历唐逮宋，又改湘源为清湘云。）

官溪水，城北三十五里。发于蒋氏坟山之湘山源，有二源，左源瑞牛坪南大界上，右源瑞牛坪北大界，二水循山而出，会于湘山庙前。其山左右环抱，曲折十余里。水自庙前山口南流二里，至猫儿口合靠背、黄瓜、唐家、架祝五源。又三里，至官渡桥。又五里，至龙头江口桥，入梅潭，会湘水。（《州志》）

万乡水，源出西延界，东流，径大仙殿北。又东，径两托坪北。又东，小桃源水西南来注之。又东，径永昌寺北，丁宁水从北来注之。水出丁宁源，南流，径全家田南；又西南流，径银河桥；又南流，径城脚村西；又南，径寡婆桥；又西南，入大仙殿水。又东，径龙水村南，霖田水从北来注之；水出霖田源，南流，径吴家村西；又南流，径大毛岭东；又南流，过龙水村，入大仙殿水。又东南流，合李家水；水出李家源，东流，径胡家村南；又东流，北折入大仙殿水。又东南流，径西江村北。又东，四渡水从西南来注之；水出西延界，东流，径源口南；又东，径象山寺北；又东南，绕官田东；又东，至谢村北入大仙殿水。又东，四方拉水从北来注之；水出四方拉山，南流，径画眉头西；又南，径鸭婆殿西；又南，入大仙殿水。又东，径桥渡西南。又东南，合寨墟关水。

寨墟关水，在长乡。源出覆釜、大帽二山麓，派衍岭底洞，纳瓦子桥诸水，又挟南洞之涧溪、海阳之瀑布与众壑细流，悉深于截滩，而出寨墟关东南，行二十里，径白石及安陂诸村，至渔船埠，合万乡水。又东北流，至流蓝埠，合大会水。

大会关水，在长乡。源出覆釜左观音山并右哪吒山下，土人所谓五马二鱼塘也。曲折行，径皂角冲诸处，合众水，出大会关，径柴侯祠下，过大陂堰。又东过石山湾，径田心南蔡家，北径竹坞北，温水从南来注之。又东，过大堂屋邓家桥南、盐山北，自出关口。凡行三十五里，过七十二堰，至流蓝埠，会万乡、寨墟二水。

桐油关水，在宜乡。源出关口，东流，径栗树头北。又东，径梅塘阎家北。又东流，至梁家北，合庙山水。又东，纳牛塘水。又东，分为二，径白沙南，又东，复合流，径大

丰田北。又东，径上宅、下宅之间。又东北，至小江口入湘水。

庙山关水，在宜乡。源出禾仓岭，东流，出关口，径白塘南。又东北，径松川妙应寺南。又北，至梁家西，合桐油水。

焦川关水，在宜乡。源出罗江，东北流，出关口（一名南宅关口），过南宅、北宅之间，径鹧鸪车东北，得咸水桥。径黄沙田北，又径新塘村车田北，雷家村水南来注之。水出雷家村西，东北流，径余家村南；又东流，过岔港桥；又东，白竹塘水南来注之。水出白竹塘东南，东流，径其村北，又东，得大拱桥；又北流，合雷家村水；又东流，合焦川水。又东南流，径金家村东，径慈光寺东。又东北流，径下源西北。又东北流，至洛口入湘水。

五里关水，在宜乡。源出五里山口，东流，过楼田南。又东南流，得石梓桥。又南，至十田东，合鲁塘水，东入湘水。

鲁塘关水，源出关口，东流，径鲁塘南。又东，径邓家村南。又东，得烈水桥。又东，过十田南。又东，合五里关水。

建乡水，源出兴安县界上，过关口，北流，焦江源水东南来注之。又北，小水西来注之。又北，径四所，历沙田，白露源水东来注之；水出白露源，径文塘北、安祉村南，至外建，合建乡水。又北，径石山脚西。又北，径小江尾东、大塘西。又北，径造化塘东。自关口，水行凡五十五里，至麻子渡。又西北流，径大马堰东北。又西北流，入湘水。（俱同上）

潏清水，出州西南八十里清泉山，西北流二十里，入湘

水。（《李志》）

建安水，在州西南。源出倚石山，入湘。（《一统志》）城西南九十里。西北流，入湘水。（《金志》）

宜湘水，州西北九十里。汇群山之水，流三十里，入湘。（《方輿纪要》）州北八十里。东北流，盐井塘水北来注之。又东北，横溪源水西来注之。又东北，至峡口，歌头源水西来注之：水出西延界，北流，径三渡江桥，又北，大头源水东来注之；又北，至峡口，入宜湘水。又东北，出龚箕山，东流，径埠头南，玉隆源水东北来注之。又东，过峡口，径歌陂北。又东，径密石岭南。又东，径宜湘南，又东，至庙头，入湘水。（《州志》）

钟乐水，出州西百里之钟石山，东流六十里，入湘水。（《方輿纪要》）

夫水，出夫夷县西南、零陵县界少延山，东北流，径扶县南。又东，注邵陵水，谓之邵陵浦口水也。（《水经注》）

西延水，出兴安界老源头，北流，径龙塘西。又北，径于家田西。又北，得金仙寺桥，州同旧署在其西。又北，径黄家塘西。又北，径龙江桥西。又北，至蛰口，水出蛰下。又北，过江口，州同署在其东。又东折而北，径咸水洞西。又北，径赤圯西。又北，至梅子凹，流入湖广新宁县。自老源头至梅子凹，水行一百七十里。两岸山水，交注数十。（《州志》）

谨案：夫夷，今湖南新宁。零陵县，今全州。少延，即西延。是水之为夫水，与郦氏注正合，特考著之。又扶县，即夫夷，古今名。

横溪，自恩乡拉底暗行四、五里至清水桥，南过田美村北，会沙子弄水，曰梅潭，合流绕其村南，径厚村，达大